

«Nus na lain naginas subvenziuns directas»

CUN ERNST WYRSCH HA DISCURRI
GION NUTEGN STGIER / ANR

■ Oz salva Hotelleriesuisse Grischun a Scuol sia 97avla radunanza da delegads. Dapi trais onns è Ernst Wyrsh, l'antierur directur da l'hotel Belvédère a Tavau, president da l'uniun cun 500 commembers. Da preschent han ils hoteliers intgins quitads e quai betg mo pervia dal franc ferm.

Vossa bilantscha sunter trais onns president da Hotelleriesuisse Grischun?

Ernst Wyrsh: La qualitad da la «Hardware» e da la «Software» (carstgauns) è s'augmentada extrem, deplorablmain è la situaziun tar la creaziun da valor per ils manaschis vegnida ils davos 12 mais considerablmain pli schleta pervia dal curs da stgomi disfavouravel.



Ernst Wyrsh, dapi trais onns president da Hotelleriesuisse Grischun.

FOTO G. N. STGIER

Las reservas da manaschi èn consumadas

Tge fnamiras avais realisà e tgeninas betg?

Meglièr avain nus cunzunt la relaziun tar la regenza grischuna, la collavuraziun cun l'organisaziun tetgala da l'economia grischuna e grazia a nossas occurrenzas per giuvenils èsi reussi da dar a quels in maletg positiv da nossa bransch. Deplorablmain èn las reservas da manaschi bunamian consumadas ed ils pretschs da las vivondas èn s'avanzads vivavant.

Tgenins èn actualmain ils pli gronds quitads dal president da Hotelleriesuisse Grischun?

La sminuziun da las pernottaziuns en noss chantun ha cuntanschì in nivel che fa quità.

En cumparaziun cun la Part sura bernaisa e cun il Vallais perda il Grischun dapli pernottaziuns?

Nus essan fixads e dependents dals giasts svizzers e dals giasts tudestgs e quai ha da preschent consequenzas. Anc profitain nus betg da la nova fiera, la China e l'India.

Envers noss gronds concurrents turistics, il Tirol ed il Tirol dal sid, sa preschenta la sminuziun tar las pernottaziuns tar ils hotels grischuns anc pli extrema?

Las medias svizras gidan al Tirol ed al Tirol dal sid cun ina champagna negativa e senza exempel cunter il turissem en Svizra e cunzunt er en noss chantun.

Las medias svizras gidan al Tirol ed al Tirol dal sid

Er ils giasts svizzers laudan adina puspièr ils hotels da tschintg e quatter stailas en quellas duas regiuns turisticas en l'Austria ed en l'Italia. Avain nus

en il Grischun memia paucs hotels en quellas categorias?

Da preschent avain nus en omaduas categorias avunda hotels, dentant memia paucs giasts. Quai vegn però a sa midar....!

Davart da la politica e dal stadi han ils hoteliers en Svizra damain sustegn en cumparaziun cun il Tirol ed il Tirol dal sid.

Gea, quai è uschia. Nus cumbattain betg cun las medemas cundiziuns. Il Tirol dal sid ed er l'Austria sustegnan il turissem en ina dimensiun bler pli auta.

Ditg concret vegnan ils hoteliers sustegnids ed er promovids memia pauc dal stadi?

Quai che pertutga l'impurtanza gea, dentant na lain nus naginas subvenziuns directas.

Il ferm franc svizzer è per il turissem per l'economia anc adina in grond dischavantatg. Han la Banca naziu-

nala ed il cussegl federal betg da reagir plaunet e preschentar ina soluziun?

Nus duvrain in curs dad 1.00 tar in dad 1.40 – dentant almain in curs minimal dad 1.20.

Nus cumbattain betg cun las medemas cundiziuns

Avain nus in problem cun il maletg (image) da la gastronomia e da la hotellaria?

Il sbagl è che nus cartain a quel problem. La gronda part dals ustiers ed hoteliers fan mintga di fitg buna lavur.

Gentilezza ed il pretsch, dus temas preferids da las medias naziunalas?

Deplorablmain rapportan ellas adina be ils exempels negativs, dentant avessan nus

uschè blers ospitants da vaglia! Per qualitad è il giast anc adina pront da pajar in bun pretsch e la qualitad, quella constat absolutamain, cun intginas excepziuns.

Nus cartain a quel problem

Reducir ils pretschs, quai è lura er nagina soluziun?

Adattar quel nua ch'igl è pussiavel, dentant nagins pretschs da «dumping», cas cuntrari na vegn ins betg pli sin las chommas.

Savens na constat quai betg

Dapli occurrenzas sco il Tour de Ski, Gaud magic, Forum mundial d'economia e Gourmet Festival, è quai ina soluziun?

Gea – i dovra finanzas er vetiers blera passiuun.

Er il giast svizzer na vegn betg pli en noss chantun sco anc avant paucs onns. Pertge?

La reclama fitg activa da noss pajais vischins funcziuna e mintgin è persvas che tut saja pli bunmartgà, savens na constant quai betg....!

La stagiun d'enviern 2015/16 vegn strusch ad ir en l'istorgia sco ina stagiun da record. Tge cussegls avais Vos per ils hoteliers?

Mantegnair la liquiditad cun dar mintga di ina egliada sin ils custs e tschertgar cooperaziuns cun partenaris.

Èsi da quintar primavaira cun serradas da hotels?

Deplorablmain èsi da quintar cun serradas, ubain ditg auter èsi betg pussiavel d'evitar quai.